

Gobernador di Aruba ta duna Marlon Croes instruccion pa contesta pregunta riba un investigacion di Secret's Hotel Aruba pero no kier contesta *Parti 1*

Den december 2023, Bon Dia Aruba a cuminsa oficialmente un investigacion periodistico riba especificamente con e proceso di e bouwaanvraag numera 0994-2019, entrega dia 14 di november 2019, di Secret's Hotel Aruba a bay, riba stempelnan di mapa di DOW y tambe departamento di Departementen voor Dienst Landmeetkunde en Vastgoedregistratie (DLV) cu ta zorg pa e midimento di tereno na unda tambe departamento di Brandweer Aruba ta den dje y cu mester keur e hotel.

Bon Dia Aruba su investigacion periodistico ta pa haya contesta si den caso aki, "leugen in de rechtszaal" den e proceso di bestuurrecht a tuma luga, especificamente den e caso di Secret's.

Hechonan

Dia 6 december di aña 2023 tabatin un caso den corte di Secret's Hotel Aruba unda cu den corte di Prome Instancia e ciudadanonan di Sero Colorado tabata sigui cu nan protesta contra Secret's Hotel.

Bon Dia Aruba bay corte e dia ey pa asina wak ki mapanan ta bay ser usa den corte, no solamente pa e mapanan pero e stempelnan di "DOW" cu ta riba e mapanan ey.

Bon Dia Aruba tabatin e mapa AR_ARQ-MP-03 hopi prome cu e proceso hudicial, pero dia 6 december 2023 mester a warda pa un banda hinca e mapa specifico aki den e proceso hudicial pa e no por ser cambia mas.

E mapa cu Sr. Rosenstand, ken ta architect di Secret's Hotel Aruba, a muestra den



corte cu e number AR_ARQ-MP-03 dia 6 di december 2023 tin stempel di 14-nov-2019 y ta mara na BA 0994-2019 cu a sali for di un saco blauw di Super Food.

E mesun mapa numera AR_ARQ-MP-03 cu DOW semper tabatin den su poder, tin stempel di BA 0853-2019 cu ta di un otro bouwaanvraag cu fecha 11 di maart 2020 entrega, anto pa colmo prome biaha e mapa aki a ser pinta 19 december 2019, cual ta 1 luna despues di e bouwaanvraag numera 0994-2019 y

cu a ser entrega dia 14 di november 2019.

Bon Dia Aruba a acerca Sr. Marlon Croes director di DOW

Dia 20 di december 2023 Bon Dia Aruba a acerca Sr. Croes director di DOW pa haci preguntanan specifico y asina por stel vast oficialmente cu e mapanan cu a ser usa den corte a sali for di un saco blauw di Super Food. E pregunta tabata si e mapanan di e saco aki tabata di DOW mes of di e architect di Se-

cret's Hotel Aruba Sr. Rosenstand. Den esaki, Sr. Croes a confirma cu e mapanan usa den corte y cu a sali for di e saco blauw di Super Food ta di Architect di Secret's Hotel Aruba Sr. Rosenstand.

E preguntanan specifico cu a ser haci na Sr. Croes ta si e como director di e departamento aki—prome cu lo retira na december awor—ta para tras di e mapa numera AR_ARQ-MP-03 cu Sr. Rosenstand a muestra den corte cu stempel di 14-nov-2019 y mara na BA 0994-2019, cual a resulta ta otro mapa diferente cu esun di DOW y a ser pinta na december 2019, cu ta un luna despues cu BA 0994-2019 a ser entrega dia 14 di november 2019.

E otro pregunta ta si Bon Dia Aruba comparti cu su persona pruebanan di posibel hechonan castigabel cu tin di haber cu DOW, Sr. Croes lo bay Ministerio Publico? Pa e dos pregunta aki, Sr. Croes no ta duna contesta.

Carta di Bon Dia Aruba dirigi na su Excelencia Sr. Gobernador

Bon Dia Aruba a manda un carta na su Excelencia Sr. Gobernador Alfonso Boekhoudt pa Bon Dia Aruba por haya un contesta oficial riba papel si director di Dow Sr. Croes ta sostene e mapa di Sr. Rosenstand.

Sr. Marlon solamente mester contesta si of no, pero e mester ta riba papel pa Bon Dia Aruba tin su version si ta sostene mapanan cu stempelnan di Sr. Rosenstand of e mapanan mes di DOW.

Despues di e carta, su Excelencia Sr. Gobernador a

manda un instruccion na prome minister Evelyn Wever-Croes pa instrui Sr. Marlon Croes duna un contesta oficial na Bon Dia Aruba.

Bon Dia Aruba tambe tin den su poder 2 decreto ministerial cu tin Sr. Rosenstand su nomber riba nan como e persona cu a haci e peticion pa ontheffing, cual ta muestra cu esaki ta firma pa ex-minister Otmar Oduber cu ta mara na un tekening di DLV y ta hinca den un acto notarial, pero e documento fisico cu ta gestempeld hunto cu decreto ministerial ta totalmente diferente y riba dje tin un tereno cu no tabata existi, hasta meetbrieven nan meternan riba e documento aki no ta klop cu esun di Kadaster.

Bon Dia Aruba lo duna Sr. Rosenstand y ex-minister Otmar Oduber nan derecho di replica tocante e 2 decreto ministerial aki cu tin su firma riba dje, pa asina scucha nan banda di medaya y si nan lo sostene e documentonan aki, e lo distancia di nan of por duna un splicacion.

Reaccion di prome minister Evelyn Wever-Croes

Den investigacion aki, Bon Dia Aruba tambe a tuma contacto cu prome minister, pa asina verifica e documentonan aki—si nan ta falso of no. Prome minister a contesta cu "Esey ta un acusacion hopi serio y segun mi Bon Dia Aruba mester ta na Ministerio Publico cu esey. Ami no ta atende ningun caso individual. E departamentonan ta encarga. Mi a instrui nan caba pa duna bo splicacion y un contesta. Mi a tuma e paso pa depolitisa e procesonan hustamente pa mi integridad no wordo atacha."

Obligacion di keho penal pa funcionarionan publico (Aangifteplicht voor ambtenaren)

Tur funcionario publico of minister tin e obligacion di entrega un keho penal si e ta draag kennis di un hecho castigabel hancra den (articulo 200 di e codigo di Procedura Penal di Aruba). Investigacion riba irregularidadnan den e proceso di construccion di Hotel Secret's ta sigui tuma luga caminda Bon Dia Aruba ta bay publica e di dos parti di e articulo aki den un proximo edicion.

